

Dragi čitaoci,

zbog objektivnog i potpunog informisanja javnosti, Centar za istraživačko novinarstvo (CIN) ima obavezu da odgovori na navode demantija neimenovane osobe iz javnog preduzeća „Komunalije“ iz Velike Kladuše.

Naši novinari su krajem aprila u Velikoj Kladuši radili istraživanje za priču o sukobu interesa u kojem se potencijalno nalaze neki od devetero savjetnika načelnika ovog mjesta. Kako bismo saznali tačne podatke neophodne za priču, 24.4.2018. godine smo sa v.d. direktorom „Komunalija“ Amirom Đogićem dogovorili zajednički obilazak preduzeća i razgovor o načinu trošenja novca koji su dobili od Općine.

V.d. direktora Đogić je tada predložio okvirno vrijeme sastanka, dao svoj broj telefona, a potom je u toku sjednice Općinskog vijeća, koja se odvijala tog dana, novinarki dao svoju vizit-karticu i rekao da mu dan prije sastanka pošalje e-mail u kojem će predložiti termin i navesti detaljnije šta je zanima kako bi se mogao pripremiti. **Ovo je pristanak na razgovor.**

U skladu sa dogovorom novinarka je poslala e-mail, a v.d. direktora je odgovorio da odgađa intervju do daljnjeg. **Ovo je predomišljanje.**

V.d. direktora je potom nastavio prepisku sa novinarkom, navodeći subjektivna i neprofesionalna zapažanja na osnovu kojih se predomislio kao „argumente“:

*„Poštovana Merima, analizirajući Vaš rad i Vašeg kolege na jučerašnjoj 19. sjednici OV Velika Kladuša došao sam do zaključka da Vam namjere nisu iskrene i da ste sav snimljeni materijal fokusirali u negativnom smjeru za sigurno već organiziranu negativnu vijest sa kojom se otpočinje kampanja za Opće izbore 2018 u V. Kladuši.“*

*„Vaša umorna i iscrpljena lica odaju da se bavite poslom koji ne želite da radite ili je nešto drugo u pitanju.“*

*„Bitniji Vam je senzacionalizam od stvarnog stanja u državi...“*

*„Sami ste vršili ophodnju po V. Kladuši, institucija ali i privatnih kancelarija.“*

*„Pristrasna saradnja sa DNZ BiH, ručak sve je to za Vas sigurno subjektivno. Vaš urednik je nekad radio u Prezentu, današnjem Reprezentu čiji je urednik i vlasnik g-din Esad Šabanagić, koji inače redovno prisustvuje sjednicama OV Velika Kladuša a na 19. sjednici nije bio prisutan. Esad Šabanagić je vjerni pratitelj DNZ BiH i redovan izvor negativnih i subjektivnih vijesti jer njegov portal i novine se više ne finansiraju iz Budžeta Općine Velika Kladuša.“*

*„Vaša uključenost u kampanju za Opće izbore 2018. je evidentna, obojana i kako kažete sa užitkom. Uživajte u Vašem pristrasnom, neprofesionalnom, nezakonitom i protuustavnom zadatku.“*

**Ovo su uvrede.**

Novinari CIN-a su ponosni na 14 godina objektivnih i provjerenih istraživačkih priča.

Fraze kojima se v.d. direktora koristi: „*učešće u kampanji*“, „*ophodnja po Velikoj Kladuši*“, „*pristrasna saradnja sa DNZ BiH*“, „*...pristrasnom, neprofesionalnom, nezakonitom i protuustavnom radu*“ i slično su velike uvrede za novinare koji profesionalno rade svoj posao, što smo i istakli u tekstu. O komentarisanju tuđeg izgleda nemamo šta zaključiti – v.d. direktor je ovakvim komentaram rekao sve sam o sebi.

Smatramo da osobe koje na ovakav način komuniciraju sa novinarima žele omalovažavanjem novinara skrenuti pažnju sa priče i omesti njihov rad. Mi se često nalazimo u ovakvim situacijama, što je skoro po pravilu znak da smo otkrili temu o kojoj pojedinci ne žele da se priča.

Priču na koju se u svom demantiju referiše neimenovana osoba iz javnog preduzeća „Komunalije“ možete pročitati i pogledati [ovdje](#).

Vaš CIN